

VI. YAKUNLOVCHI QOIDALAR

26-modda. Xususiy korxonalarning birlashishi

Xususiy korxonalar o'z huquq va manfaatlarini himoya qilish maqsadida qonunga muvofiq assotsiatsiyalarga (uyushmalarga) va boshqa birlashmalarga birlashishlari mumkin.

Batafsil ma'lumot uchun O'zbekiston Respublikasi Fuqarolik kodeksining [77-moddasiga](#) va O'zbekiston Respublikasining 2018-yil 9-iyuldagi O'RQ-483-sonli "O'zbekiston Respublikasi savdo-sanoat palatasi to'g'risida" (yangi tahriri)gi [Qonuniga](#) qarang.

27-modda. Xususiy korxonani boshqa shaxsga o'tkazish

Xususiy korxona mulkdori xususiy korxonani mol-mulk majmuasi sifatida sotishga, hadya qilishga, vasiyat qilib qoldirishga yoki uni o'zgacha usulda boshqa shaxsga o'tkazishga haqli.

Xususiy korxona boshqa shaxsga berilgan taqdirda o'zining firma nomidan, tovar belgilaridan, xizmat ko'rsatish belgilaridan hamda mazkur xususiy korxona va uning mahsulotini, u bajarayotgan ishlarni yoki ko'rsatayotgan xizmatlarni individuallashtiruvchi o'zga vositalardan foydalanish huquqlari, agar qonun hujjatlarida yoxud shartnomada boshqacha qoida nazarda tutilgan bo'lmasa, yangi mulkdorga o'tadi.

28-modda. Xususiy korxonani qayta tashkil etish va tugatish

Xususiy korxona uning mulkdorining yoki qonun hujjatlarida belgilangan tartibda sudning qaroriga ko'ra qayta tashkil etilishi mumkin.

Xususiy korxona uning mulkdorining yoki sudning yoxud ro'yxatdan o'tkazuvchi organning qaroriga ko'ra tugatilishi mumkin.

(28-moddaning matni O‘zbekiston Respublikasining 2019-yil 11-dekabrdagi O‘RQ-592-sonli Qonuni tahririda — Qonun hujjatlari ma’lumotlari milliy bazasi, 12.12.2019-y., 03/19/592/4144-son — 2020-yil 1-yanvardan kuchga kiradi)

Batafsil ma’lumot uchun O‘zbekiston Respublikasi Fuqarolik kodeksining 49, 53-moddalariga qarang.

29-modda. Nizolarni hal etish

Xususiy korxonalarning tuzilishi, faoliyati, qayta tashkil etilishi va tugatilishi sohasidagi nizolar qonun hujjatlarida belgilangan tartibda hal etiladi.

30-modda. Xususiy korxona to‘g‘risidagi qonun hujjatlarini buzganlik uchun javobgarlik

Xususiy korxona to‘g‘risidagi qonun hujjatlarini buzganlikda aybdor shaxslar belgilangan tartibda javobgar bo‘ladilar.

O‘zbekiston Respublikasining Prezidenti I. Karimov

Toshkent sh.,
2003-yil 11-dekabr,
558—II-son

(O‘zbekiston Respublikasi Oliy Majlisining Axborotnomasi, 2004-y., 1-2-son, 8-modda; O‘zbekiston Respublikasi qonun hujjatlari to‘plami, 2006-y., 12-13-son, 100-modda; 2007-y., 52-son, 533-modda; 2011-y., 37-son, 374-modda; 2012-y., 37-son, 421-modda; 2014-y., 20-son, 222-modda; 2015-y., 33-son, 439-modda; 2017-y., 1-son, 1-modda; Qonun hujjatlari ma’lumotlari milliy bazasi, 21.03.2019-y., 03/19/531/2799-son; 12.12.2019-y., 03/19/592/4144-son; 08.01.2020-y., 03/20/601/0025-son)